



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr.137/2019

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Adnan Konushevci kryesues, Nenad Lasić dhe Afijete Sada Gllogjani anëtarë, me pjesëmarrjen e zyrtares ligjore Fatjona Bekteshi, duke vendosur përkritazi me ankesën e Lëvizjes Vetëvendosje, me seli në Prishtinë, paraqitur kundër subjektit politik Partia Demokratike e Kosovës (PDK), me seli në Prishtinë, për shkak të vendosjes së tendës në hapësirë publike, për Zgjedhjet e Parakohshme për Kuvendin e Republikës së Kosovës, që do të mbahen me datë 06.10.2019, në seancën e panelit të mbajtur me datë 02.10.2019, mori këtë:

V E N D I M

Pranohet e bazuar ankesa e Anr.137/2019 e datës 30.09.2019, e paraqitur nga Lëvizja Vetëvendosje (LVV), me seli në Prishtinë, subjektit politik Partia Demokratike e Kosovës (PDK), i shqiptohet gjobë në lartësi prej 2,400.00 euro (dymijë e katërqind), të cilën gjobë DETYROHET ta paguaj në afat prej 15 ditësh, nga dita e pranimet të këtij vendimi, nën kërcënim të përmbarimit.

A r s y e t i m

Me datën 30.09.2019, Lëvizja Vetëvendosje, ka paraqitur ankesë në PZAP, në të cilën pretendon se me datë 30 Shtator 2019 rreth orës 09:30, në sheshin “Skënderbeu” në Prishtinë, kanë vërejtur se Partia Demokratike e Kosovës (PDK), ka vendosur “TENDË”, në kundërshtim me nenin 33 pika b) të LZP-së dhe rregullën zgjedhore 13/2013 të KQZ-së. Si dëshmi ankesës i kanë bashkangjitur fotografitë në cilësi të provës materiale.

Në përgjigje në ankesë të datës 01.10.2019, subjekti politik PDK, thekson se edhe përkundër faktit se ekziston pëlqimi nga ana e Komunës, për këto hapësira, ne kemi marrë masa përmirësuese duke i tërhequr tendat në fjalë. Më tutje në përgjigje subjekti politik PDK konsideron se është krejt e palogjikshme që PZAP të mos i merr në konsideratë vendimet e Komunës kur dihet se Komuna është përgjegjëse për këto hapësira, për fushatë zgjedhore po përdoren shkollat dhe objekte tjera publike si salla sportesh etj, dhe këto nuk po konsiderohen shkelje kur dihet që statusi i hapësirave publike është i njëjtë

PZAP-i, pasi që shqyrtoj ankesën dhe shkresat e lëndës vlerësoi se:

Ankesa është e bazuar

Paneli nga fotot e ofruara si provë nga parashtruesi i ankesës, të cilat gjendet në shkresat e lëndës, në mënyrë të padyshimtë, ka konstatuar se tendat me materialet zgjedhore të subjektit politik PDK, janë të vendosur në hapësirat publike në sheshin “Skënderbeu” në qytetin e Prishtinës.

Nga dëshmitë e sipërcituara paneli në mënyrë të sigurt ka vërtetuar se subjekti politik PDK, me seli në Prishtinë, ka bërë shkelje të Kodit të Mirësjelljes për Subjekte Politike, Mbështetësit e tyre dhe Kandidatët, nga fakti se tendat dhe shtandet e vendosura në hapësirat publike, paraqesin veprime të sanksionuara me dispozitën e nenit 33 pika b) e LZP-së, e cila

përcakton “ *Vendosja e njoftimeve, pllakateve dhe postereve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugë publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa lejen e pronarëve ose shfrytëzuesve*”..

Paneli, vendimin e tij e ka mbështet në dëshmi të qarta dhe bindëse siç përcaktohet me nenin 117 par. 3 të LZP-së, prandaj pretendimet në përgjigje në ankesë nuk u cilësuan me ndikim në meritat e lëndës.

Parashtrimet në përgjigje në ankesë të subjektit politik PDK se është krejt e palogjikshme që PZAP të mos i merr në konsideratë vendimet e Komunës kur dihet se Komuna është përgjegjëse për këto hapësira, Paneli pretendimet e tilla i vlerësoj si të pa bazuara dhe si të tilla i refuzoj pasi që, me këto prova nuk justifikon veprimet që janë të ndaluara dhe në kundërshtim me dispozitat ligjore të Nenit 33 pika b) i LZP-së, si dhe neni 5 paragrafi 1 pika d) e Rregullës 13/2013, ku parashihet se subjektet e certifikuara politike aktivitetet e tyre zgjedhore duhet t'i bëjnë në pajtueshmëri me Rregullat zgjedhore të Komisionit Qendror Zgjedhor (KQZ). Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin së PDK-ja, ka qenë e njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteve lidhur më fushatën zgjedhore.

Si rrethanë PZAP-i, mori edhe faktin që këtij subjekti, ia dha mundësia për tu përgjigjur ashtu që në përgjigjet e tij ka deklaruar se kemi ndërmarrë veprime për evitimin e shkeljes duke i bashkangjitur përgjigjes në ankesë një fotografi ku shihet se është bërë heqja e tendës. Ndërmarrja e masave përmirësuese nga ana e subjektit në fjalë ka ndikuar në lartësinë e gjobës së shqiptuar si në dispozitiv të këtij vendimi.


Paneli në kuptim nenit 118.1, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtrësia

Anr.137/2019 më datën 02.10.2019

Kryesues i Panelit

Adnan Konushevi



Këshillë Juridike: Kundër këtij vendimi nuk është e lejuar ankesa sipas nenit 118 par. 4 të LZP-së.